

四庫全書

集部

欽定四庫全書

榮陽外史集卷二十三

明 鄭真 撰

序

送平涼府判官徐公復任序

平涼為西北邊郡控制蕃部勢極萬里國家倚為重鎮
元勲碩望高牙大纛將命出入弘遠畧而奏膚功者相
踵也一介使副輕車駟馬旌節所向宣上德而達下情

者相接也殊方異俗一統咸歸荷旃披毳之流匍匐僂
僂效誠奉貢者若百川之歸海衆星之拱極也彼其地
大物盛則夫任撫綏佐輔之寄者可以不得其人哉江
右徐公宏遠以南州高士之裔由孝悌力田得判平涼
府事上任以來承上接下無不得宜而其錢糧戶口農
桑學校凡職之所係者實盡心焉既三年考滿入覲拜
恩華蓋殿下錫燕而歸中朝士大夫且賀且喜咸賦詩
為贈請予文為序夫民社之司所係者重漢時長吏安

官樂職或長子孫以官為氏其治行之著者則璽書褒
寵增秩賜金蓋所以重斯民去思之心以為久任責成
之法也豈徒玩歲愒日以養資格為哉公之倅平涼吏
民既熟其為政矣其來朝也必企首翹足而望曰盍歸
以撫我乎今既慰所望矣則夫教令之施固將奔走之
不暇矣異日報政上聞尊官重爵其不有以寵綏之乎
夫府倅之於太守義均休戚使夫慎終如始協衷和恭
庶幾上副國家委寄之隆哉傳曰不懈于位民之攸暨

公其有焉予弟竒簿莊浪時於公有周旋之契故於公之行敢誦言以勉公名原別號闕溪漁叟云

吳氏譜系序

予以臨淮學官考滿與鳳陽教授吳先生進牌入覲闕下對清光聆玉音應制進詩薦承宴賜一日朝華蓋殿先生以稱職授寧波府主簿予亦忝除廣信教授幸得過家上冢與先生買舟東行先生既上任寧波士大夫且賀且喜造謁館下先生出示譜牒且曰某忝以世緒

謬拜恩擢民社之司凜不自勝維是系序之傳奉以周旋不敢失墜今老矣尚未有子息嗣而續之其能無所望也耶縉紳君子諗焉觀焉仰其科名之懿世澤之厚執筆撰述盈諸卷軸俾子序作者意夫君子莫貴於重本譜牒之繫有尊祖睦族之義焉非所謂重本者乎以吳為周室之懿胤昔者太伯仲雍以天下讓至延陵季子而讓國益以明著自國而家子孫蔓延天下有能謹尊祖睦族之義則泰伯季札退讓之風千載一日也然

以莆田水南一族觀之由宋以來號為全盛五太守狀
元坊之號功名爵祿冠於閩南至於晚歲潮州倅君復
守節義可謂世臣喬木也已恭際熙朝右文更化先生
嗣而承之文章德行掌教中都自王邸臺察至郡府州
縣皆改顏而禮貌之由是出倅于鄞凡簿書刑政之宜
詩書禮樂之正異日公侯復繼萬石君家之盛豈非寧
波士大夫祝願於先生者乎夫家有譜牒國史取信唐
太宗詔許敬宗類天下氏族序世家者有考焉乃今紬

書金匱述作並興若斯譜者上送之官豈不足以風厲天下乎可但昭穆世次為一家之傳耶孔子曰吾學周禮有宋存焉予於吳氏譜亦云

送廣信守禦千戶陳公赴召命序

國家以神武定天下熊羆爪牙之士以忠信勇力自奮於功名爵祿之會者以戰則有一月三捷之功以守則有專城方面之寄勲名載史冊聲譽在朝宁恩澤在子孫吁其不盛矣哉定遠陳公某自幼以材畧稱際聖主

龍飛江左環甲執兵與在行間累功至武毅將軍守禦
千戶由永新移廣信所至號令精明軍民按堵迺洪武
十四年朝廷命取雲南公以兵隸安陸侯帳下時公年
幾六十氣體充肥而騎步便捷所向有功行營以老將
目之逾年八月進兵邏邏斯之地羣蠻立柵山中者首
尾相應猝不易拔衆議以百者當一寨為賊往來要衝
巖崖壁立最險而固宜以奇兵出其不意取之則諸寨
不攻自破矣求將難其人安陸侯以屬公且許重賞公

曰某當捐身報國無他冀也設死得一棺足矣況未必死乎約以是日四更復命於是率百夫長南陽衛臧勝廣信所張榮壯士四十餘人乘夜攀藤蘿以登賊不知也一鼓拔之捷報如約自是西堡及阿黑白崖關七寨皆震懾請服安陸侯酌以卮酒誇為雋功上其事于朝公既振旅還廣信逾年命召還闕下蓋將獎厲賢勞致其委寄任使之隆也公其可得而辭哉夫竭忠敵愾固臣子之用心而賞功錄善實朝家之盛典三代以來

尚矣漢置武功爵以賞戰士多至超等或賜武臣則倍於文官所以閔其勞而敘其績者何如哉昔者傅介子班超之流其始皆以下位致顯秩實由在上者有以致之以公職長千夫寵榮亦已至矣然以安陸侯知人之明公克承知己之遇善將善兵於斯為至故能以上多之績膺促召之榮則夫推轂之命齋壇之拜其不在於今日乎易師卦九二之象曰在師中吉承天寵也王三錫命懷萬邦也夫人臣有功而君寵任之豈為一人哉

所以為天下後世勸也君其益思盡力以報上哉將行
廣信士大夫戀戀不忍別請予為之序云

送廣信府同知嚴陵方公入覲序

國家朝會之制歲時大慶海宇普同其在內文武百司
則有常朝起居之禮在外布政按察暨府州縣之長若
貳及首幕司者每歲首賜之來朝隨班上壽考其功過
而以時賞罰焉迺洪武十七年歲在甲子春正月朔旦
天子御奉天殿文武兩班以次序立車輅象馬羽衛兵

伏左右環列司晨唱晨侍儀引禮教坊奏樂拊舞拜賀宴
賜如式十有六日玉音若曰凡在外入覲者其各歸爾
職寧爾民慎爾政若事明年孟春朔旦爾等其復來於
是廣信府同知方公弘道服膺維謹以其年十二月上
旬士大夫送至門外者皆懇懇致其祝規而四明鄭真
颺言於衆曰公其慎於禮哉周禮行人時會以發四方
之禁蓋以禁止天下之不義也若乃巡狩方岳五年六
年一朝之制則諸侯考禮修德以尊天子是故明試以

功車服以庸乃虞廷慶賞之盛玄衮及黼路車垂馬則
周人錫予之公世運既降虞周氣象不可得而見矣然
而君臣上下本水本原之義固有亘萬古而不泯者則
人心天理之正也仰惟聖朝龍飛啟運聲名文物前代
莫及而同知公以文學起家貳茲甲郡仰瞻天上清光
咫尺則夫赤芾金舄所以雍雍其來肅肅其止者在今
日矣至於民生之休戚風俗之淳漓政治之臧否農桑
學校錢穀甲兵之重承顧問而綏寵祿者不在茲乎易

晉卦明出地上之象曰康侯用錫馬蕃庶晝日三接同知
公幸際盛平名華仕版幾於古之康侯矣錫命之榮不
有協於易象矣哉雖然天眷之隆民望之隆也公佐政
已及三年政治浹於人心久矣今其行也咸曰其亟歸
撫我乎夫天之心即民之心也天之所欲民必從之公
盍以慰其心哉

送長沙衛馬千戶上任序

壽陽淮潁要衝有淝水八公山為形勝實漢晉以來用

武之地其人多英勇果毅有古烈士風皇上龍飛淮海
壽陽為中都畿邑帝鄉戚里輦轂之近凡具一材一藝
者皆奮迅挺拔自致於功名之會矣其非雲龍千載之
逢乎馬公世家壽春早以膂力聞執兵行間從征伐有
功授廣信百戶盡心率職將二十年會朝廷有事雲南
公以百人從行以戰以取鼓勇先登為大將識拔雲南
既平斂兵而還召入闕下論功行賞昇授長沙左所千
戶公既拜恩奉符文過廣信挈家上任千戶王公及同

寅周公送至西門外執爵言曰公其自此昇矣一郡之
寄我誰與諮謀乎予起而解之曰有功加地進律古之
盛典以公勲在邊廷名在簡冊則夫進官升秩有不容
已者豈廣信所能久羈也耶昔漢新息侯南定交趾表
功銅柱圖像靈臺此公家世事也今天子垂意輜畧之
士制武功爵錫貂冕以表儀朝寧以公淮產之英戰多
之績安知不為公為侯與新息侯相望於千載之上哉
衆以予言為然酌酒言別而俾予敘以贈

送長沙鄭千戶上任序

國家誕受天命四方九宇悉主悉臣而雲南小醜僻在
荒陋未入職方遂命熊貔之將虓虎之師一舉而郡縣
之由是雕題鑿齒之流漆頭花角之衆以朝以貢旦夕
往來不絕於道而聖明之化益大以遐矣吁其不極盛
矣乎寧國鄭公景祥智勇之士也為廣信百夫長將凡
二十年師征之日獲預行間既定中慶遂入邏邏斯之
地羣蠻列柵保險猝不易拔公鼓勇先登諸寨相繼款

服行營嘗上其功洪武十七年冬上命之來朝授長沙衛右所千戶所以示勸典也夫師克用命固足以成將帥之勲而賞不踰時尤所以示人君之信以公職居偏裨而功在上多則所以奉成命而綏寵祿者不在茲乎長沙在三江五湖之中左控荆門右通夏汭實東南用武之地金城湯池所以綏勇畧而奏膚公者多有其人今天下太平耕桑千里熙熙然仰宇俯育之時也然而樓櫓之備器械之修所以警戒不虞者固上下所宜同

致其力者也夫嚴於備禦則疆域靜勤於綏撫則民心安長沙節使既克承屏翰之寄矣公其盡心周旋以古名將自期哉公既拜恩過廣信携家以行千戶王公與同寅周公且賀且餞以予在斯文請為之序

雪霽圖詩序

雪霽圖者元清江守李公圓嶠所作也皴法遠師董元近學馬遠而意匠經營精入能品其山之峻險者若鸞鳳之軒翥突兀者若車馬之奔馳橫者如案平者如展

崇巖別嶽盤薄起伏不可名狀而同雲積雪一色皜素樓臺層觀仙居佛所天光下燭恍然不知其為人間世也迺若野水微茫長橋偃卧古木荒籬閒門自掃有倒屣迎客之意乘扁舟之清興者殆維其時巖广架广足迹罕至而睡酣焦寢凍逼袁門者可以問無恙也峻嶺巍峩脩途慄冽歷藍關而謫潮陽者髣髴如見其人焉想其運筆之時清氣吐吞傲睨今古所謂咫尺應須論萬里者豈虛言哉圓嶠既没五十餘年是圖流落人間

武林劉公購得之愛賞弗置自京師出入燕冀復渡海
入遼水天雪野無入而弗自得焉歲時速客每出以示
曰是殆類我親歷矣按圖索象其在茲耶縉紳君子多
為詩文贊詠之予得諦觀焉起而告之曰公可謂托物
君子矣夫物之白莫雪若也當夫六靈飛洒萬象交輝
凡汙而穢黝而黑者無不白矣人稟天地之氣以生人
心衆理之會不與雪同其白乎且夫雨雪浮浮見覩曰
流詩人之興以雪之霽也雪之霽以日陰陽動靜循環

無端於是時也俯仰上下我室我閨內融外明妙悟無際豈獨山川之勝可玩可說也哉公由吏入仕所至以清白稱今通守廣信與司一郡之寄靈府真君光華透徹蓋將化炎熱為清涼變塵垢為皎潔者由是上瑤墀登玉陛贊襄燮理致三白豐年之兆所以綏寵祿而介遐福者不亦可乎莊周所謂虛室生白吉祥止止者庶幾在此此固畫史意外之意使圓嶠可作寧不有取於予言哉公顧予一笑遂書以為序時洪武十八年歲次

乙丑三月十一日鄉貢進士具官鄭真序

梅隱詩什序

木植之在天下多矣獨梅稱百卉之魁彼其固陰沍寒
萬木僵仆而瓊肌玉質傲晚山谷間回視凡葩俗卉馳
驚於豪奢侈美之地不啻輿臺矣隱民逸士羨慕而培
殖之其為德之似乎上饒徐饒彰父忠信慤實士也杜
門求志不樂仕進所居多梅每相羊其下理融心契
慨然嘆曰孰使予不過于時而樂焉忘返者非梅耶遂

號曰梅隱縉紳君子多為贊詠之其所以發明隱之為
義者矣然隱者顯之對隱正所以為顯也寓情草木云
乎哉想夫宴坐清適芳馨四來歲寒高節永保貞固視
夫軒裳珪組渺渺然羅浮一夢中矣迺今聖明在上將
使髦俊之士版築之英從容廟堂之上是以狀元及第
之榮宰相調羹之用皆於梅比興焉饒彰遠在林野而
聲譽藹然我不知君終隱於梅乎梅終能隱於君乎於
是做小山叢桂賦招隱之辭曰歲晏兮冰雪寥孤芳兮

高潔紛夫人兮嫵節挹前脩兮遺烈凜兮慄漻兮次杳
冥冥兮巖穴嶮兮僻黯兮寂履巉巖兮峻陟閭林扃兮
深蟄賦考槃兮以遊以息邈羣仙兮姑射容姿澹兮的
皦炫皜素兮裳衣耿心腸兮銑石青天指兮白日敦永
好兮焉極琴樽兮棊奕樂逍遙兮以永朝夕望天上兮
九重聖人作兮風虎雲龍仰黼宸兮重瞳衣冠肅兮會
同君胡為兮山中山中兮盤紆窈誰歌兮白駒攀南枝兮
躊躇虎豹叫號兮熊羆嘯呼日將暮兮孰華子玉佩兮

瓊琚盍翱翔兮宸都吁嗟山中兮不可以久居饒彰聞
之曰是所謂誘我者耶我於木母誓終身矣予知其不
能屈也遂序于羣言之首

大江圖詩序

江右山水郡稱吉安吉安屬邑凡九而言水文江為勝
江控上下流綿絡數千餘里羣峯環列其高而銳兀而
起迤邐而平行者若筆之削架之橫而几席之奠也由
宋以來若參政六一歐陽公丞相平園周公文山文公

生相先後而其文章之懿功業之盛節行之高與文江山川相為無窮矣百餘年來風聲氣習猶有存者嗣而續之將不見其人乎趙原高氏純謹慤實士也家居文江為天潢舊族際今聖朝以才行薦為江西憲府吏處心公正論事平允上下咸以能稱原高自念有母在堂望家尺咫未及遙邁而情有弗能自己者於是即文江之勝繪為一圖時焉展玩俯仰上下神馳意往庶幸母之安以慰其心焉縉紳君子多為詩歌以贊詠之以予

職在斯文俾為之序夫母子之親彝倫所重陟屺之詩
曰陟彼屺兮瞻望母兮母曰嗟予子行役夙夜無寐而
四牡之詩曰王事靡盬不遑將母一則孝子述其親之
望而欲其歸一則人君序其臣之勞而本其情此詩人
忠信之至也原高服勞憲府而念念其親豈以家事廢
國事以公義廢私情者哉且夫地靈人傑古今所稱眉
山以三蘇父子而益重于蜀鑑湖以賀公季真而益著
于越夫有其地而無其人則其山川之氣亦抑鬱而不

舒矣以文江為吉水之勝先哲之生固多後人續之豈
少哉後人不以先哲為心則不惟上負明時下負所學
抑且有媿於山川之神靈矣夫出處隱顯一致而已然
而林泉窮僻孰愈朝市之富臺憲之貴草衣木食與田
夫野老相羊東阡西陌間孰愈紀綱要地操持文墨謀
謨畫諾為繡衣叅戎司天子耳目之寄哉原高職在憲
長以賓禮待之所以期望者至矣有事焉勿忘焉爵祿
之來如鄉先達以顯親揚名可也豈徒有事山林間應

戀膝下而已哉孝子不匱永錫爾類予於原高深有望焉

送廣信府太守劉公母喪還霸州序

洪武十八年之夏聖天子以來陽丞霸州劉公循理授知廣信府事既上任三月以母夫人鄭氏年幾七袞遣使取以就養未幾霸州有司以其家計來上公袒踊括髮水漿不入口號慟再曰天乎我不得在家而使母至於此我罪大矣徒跣哀經即日登途廣信士民攀號

戀慕有作佛事以薦福者於以見公純孝之至以心感
心矣夫親喪固所自盡也天理人心非由外鑠原始反
終情所弗忍而禮無不至於其氣之絕也升屋履危以
其上服三招之則猶冀其復生也不生矣於是制為死
具故飯而含致孝養之宜不欲其親口齒之虛也衾而
襲致歸全之義不欲其親體膚之露也乃若朝夕之奠
祥禪之節其於四制之義亦云脩矣以公文學政事上
承恩寵一麾出守太夫人在堂限以官守缺於定省壽

考奄終棺衾殯斂弗躬弗親想其瞑目屬纊之辰正安
車奉迎之日倚閭之望莫致陟屺之悲無窮公於是亦
無以為情矣然而喪事即遠有進無退變而不失其中
不亦可哉奔喪之禮見星而行見星而舍茲固不能以
留公矣入境至家升自西階服喪盡禮有如初喪賓
客固有吊而大悅者矣先隴之陽有若堂若防者寔焉
寔焉歲焉想其志氣神明之存望望然皇皇然追而弗
及求而弗得也而欲報之德終其身弗忘天地鬼神實

臨之孝感之徵將見嘉禾之生醴泉之湧赤烏白雀飛
翔馴集於墓田之左右矣國家以孝理天下異日金花
紫誥推恩泉隧不曰忠孝萃於一門乎此固予所望於
公者也於其行學校之士以公有德於斯文効蓼莪之
詠為公祖道而予為之序

又

古喪禮雜見傳記多矣而於奔喪一事尤致意焉蓋禮
莫大於送終人子之於親死生大變豈不欲曲盡人事

哉然或服勞于公官守言責有不可廢公義而徇私情
故於親之疾不克致湯藥飲食之奉沒不及親棺衾殯
斂之具是以先王制為奔喪之禮有望境盡哀及門升
自西階之說所以順情而為之節文也嗚呼慎終追遠
民德之歸厚也可不重哉益津劉公循理奉上命知廣
信府事上任三月以母夫人在堂取以就養未至而其
家以母夫人卒訃諭之則九月十八日正遣使奉迎之
時云公號慟仆地即日徒跣登途廣信士民攀留莫得

有些哀於其母者曰母子至親一氣分兮於惟夫人慈而仁兮篤生我公子我民兮大義彝倫親所親兮親曰仙游公弗留兮民心悠悠曷其有瘳兮惟公之思繫夫人之悲兮百身可贖我焉辭兮予聞而解之曰親莫重於母子愛其子以及其母斯其為人情天理之至哉夫公之得其民如此則公之為政可知矣初公之別其母也蓋以致君澤民為念不以舍朝夕定省為戚也千里南來司一郡民社之寄尺書傳報固足以慰其母之心

矣然而鼎釜之娛莫致風木之憾遽聞則亦付之無可奈何而已且夫親者我之所自出也非有賢母不有賢子以太守公本家教之盛以及夫人人是夫人為不死矣先靈在天昭昭不昧公其慎於禮哉將行合府所屬咸以公之德不能忘也請予文以餞夫人心所向風化所由成也採輿人之頌以傳之其非士君子所當用心者乎若乃宅兆之安寢席之薦載諸禮經則公固素學之矣予不得而贅也

同前為李通判作

近予以人才薦入京師與燕南劉公循理陝西李公大本試藝天官銓選文華殿伏蒙上恩授公知廣信府事大本府推官予亦忝以非才為通判既受符契謝恩丹陞公車上任四人者既志同道合庶幾協恭以對敷不顯明命哉廣信江西屬郡地瘠民貧而公務繁冗使者往來交錯旁午公厲之以勤持之以靜而律之以公由是治體一新凡貢賦之征貨財之奉簿書期會之集告戒

從容誠意懇至闔郡吏民勸趨恐後數百里內民生按
堵與時休息咸謂太守公之賢庶幾於古之循吏矣方
將興廢舉墜撫綏教訓成禮俗之盛而乃以母夫人在
堂奉迎間遽以訃聞於是士民失所依歸矣留連展轉
何忍公之去哉夫君親天地之至恩忠孝臣子之大節
以公恪職事之恭而復盡孝思之敬為臣為子兩得其
道矣予嘗讀韓詩外傳載皋魚一事以為木欲靜而風
不停子欲養而親不待至於哭泣以死孔子門人聞而

歸者三十餘人則其心之所感如此也公世家益津田園之入足以娛親初仕來陽祿賜之厚既得致慈顏之奉矣何有臯魚之憾乎然而大孝終身之慕公何敢自已其心耶北望燕山千里遙邁衰經上堂見其母之殯如其母之存也戀戀之誠何如哉以塋以祭祥禪如式三年服闋起復登朝德業之盛必有上報國家下及民生矣豈獨一郡被其澤哉於是衆以為然相率再拜揮淚而別予與推官同致僚友之誼為之序以餞云

同前為李經歷作

予以非才為有司薦入天官蒙恩授廣信府經歷與知府益津劉公相先後而同日上任闔郡之政咸仰成於公凡害之未除者剷削無遺利之未興者設施恐後由是吏民向風吐情供實獄訟之決舉得其要貨財之征應時而集稅貢之登倉庾之實禮樂祀典之謹戈甲器備之修而又勉勵學校嚴賞罰以別勤惰創三皇殿使其師弟子瞻敬而企仰焉予不能事事而有太守公在

上為之綱維私竊自喜庶幾可無戾矣居無何公之母鄭氏以卒訃公即委篆於通判李公徒跣哀經望燕山而馳焉六曹之吏若典皆曰公我父母也自今何所承命奉教以為依歸哉欲留公弗得請予通其意予誥之曰諸君子之於公固為厚矣其如禮制何且我聞之孝於親者必忠於君公以太夫人之命出事天子一麾出守士民皆稱為賢臣職盡矣太夫人壽考奄終五福具備則公純孝奉養所致也限以官守千里在遠殯斂弗

親苦心荼毒計日兼程言邁言邁豈為君等留哉夫攀
轅卧轍不欲公之去者諸君子之情也星言夙駕亟去
弗顧者太守公之情也情之所在理之所在豈不為兩
得哉傳曰民之秉彜好是懿德其此之謂乎予於公有
賓僚之契尤不忍別者於諸君子之請心實戚戚焉公
行矣山川深阻冰雪歲寒其節哀順變歸盡大事朝夕
服食之宜必致其謹毋徒以齊蔬飡粥飢寒傷生也

滎陽外史集卷二十三

欽定四庫全書

榮陽外史集卷二十四

明 鄭真 撰

序

送鳳陽府儒學教授吳義孚先生謁告歸莆田序
閩南為儒先過化之地自龜山楊氏得程子之學於是
我道南矣考亭朱子承延平李氏屏山劉氏之傳自是
環閩以南家洙泗而戶鄒魯仁義道德之說藹如也世

運既微文獻凋落故家子孫有原伯魯之誚求其詩禮之澤久而益振以師道自任若今吳先生者何其少哉先生閩產也自幼穎悟承先君子石亭翁之訓年二十有九慨然曰我不讀書為士以祚其門不名為人從師取友玩心經史凡性命義理之微天人禮樂之奧莫不究悉為文章敦尚本實浮夸綺麗一切弗道值世事既非隱居深山為學者師足跡不入城府際今天朝以科目頒天下命與其賢者能者有司強起先生藝閩省先

生力辭且曰科舉誠我家故物然投老山林無意於世
久矣不得已以書經領洪武五年鄉貢進士薦計偕京
師將告歸適分巡監察御史張公度上言中都興王之
地四方視為取則而教席多虛非所以崇化天下也朝
廷用其議丞相及大宗伯以先生龐厚老成且在科名
優等遂授今鳳陽府教授縉紳咸賀以為得人既至而
負笈子弟皆遷謫之家心不樂學至視簡冊為害已先
生博以經訓約以文藝誨之諄諄而誘之循循也既三

年告諸生曰我老未有嗣息宗祀欲有所屬將歸經紀其家復來委心焉於是請使府申諸吏部吏部報可遂給告以去夫君子之道人倫而已道之所存教之所存也故自身而家自家而國自國而天下躬行心得寧有過於彝倫之外者哉於此而不得其理何以為淑諸人之本也耶先生之歸君子以為能致其重者矣春日載陽脂車言邁宗姻鄉黨歡言來迓覽田園之瘠肥慨風景之非昔則亦時其興之所至云爾莆陽南閩甲郡在

昔衣冠尤號為盛立言之士若夾漈鄭氏石林葉氏四如黃氏與考亭相望先後其經史註釋制度考索於名教實非小補而近時陳氏衆仲亦有古詩文為士大夫所誦顧諸君子之書久已傳世然而山川地遠後生晚進莫之見矣聞其家尚有其人先生歸試而問之購取以來嘉惠淮海之士豈非鄙賤之所望哉庸敢敘以為贈先生名烈字義孚號方齋所著有卧雲集其考德問業則先朝文獻若鄭先生獻可林先生學矩云洪武十

年三月朔日鄉貢進士四明鄭真序

送睢州學正永嘉劉貢寓上任序

天子在位之七年命天下郡縣守令各薦士三人時我四明陳德源氏為重慶府巴縣丞已僻在西陲人物稀少懼無以上答明詔鄉友項熙原同仕蜀西謂之曰士信於知己彈冠結綬必有推挽之者若永嘉劉氏南金字貢寓者其可乎哉德源曰何如熙原曰貢寓世為溫儒族讀四聖之書觀象玩占達陰陽造化之理聖運肇

開士凡一材一藝者皆拔毛脫穎翱翔青雲貢寓杜門
謝客耳若不聞忍貧茹蔬裕如也方今旌車四出野無
遺賢可使若人者終老於巖泉間耶於是德源上其名於
四川行省行省咨之吏部吏部符溫有司強起之貢寓
不得辭焉與羣士同詣吏部試易義中選將調官天官
宗伯議諸丞相以為通經學古者未可煩以有司當使
施教一方苟才賢輩出則其有功也大矣丞相從其議
遂得為睢州學正上任過淮臨以予同在斯文求一言

以贈夫政與教非有二塗今日之所以為教即異日之
所以為政也國家設立學校置師弟子員非有錢穀之
勞簿書之冗巍坐臯比與諸生日求其所未至士之以
文學自任者固樂為之而有不得遂也而今幸而得之
故必有得道忘勢之君子遇夫尊德樂道之諸侯優禮
崇獎摳衣負笈者得以激厲成就之奈何今之有司視
為故常漫不加恤而掌教者亦僅僅自守玩歲愒日冀
幸一旦以去況夫中原多故以來故家文獻既以湮微

父兄之於子弟甘心樵牧視簡冊為累已其來非一日
矣貢寓學高而強氣正而蒼行端而方所以轉移其心
術開示以正途下學上達俊乂林立登庸於朝為端人
為正士斯不負菁莪樂育之意豈徒日月書季考詞章
句讀而已哉睢為汴宿之衝華夏文明之地也昔者蔡
丘之會諸侯封人之見夫子於是乎在仰惟聖明在上
王道大明五伯之事誠不必論睢之士大夫見貢寓者
於言動詞色有若封人得諸觀感之間則貢寓之道將

大行於時矣予與貢寓早嘗相聞而於陳項二君子皆有同鄉契家之舊薦賢舉善二子既為得之若睢學之得吾貢寓抑何其多幸哉於是為之喜而俾予敘其事以贈

送潁上縣教諭徐景顏先生復職序

洪武九年十二月中書省檄鳳陽府凡通經博學之士在教職者悉取以來蓋相君上副天子宵旰求賢之意欲盡天下之才儲之館閣謀猷黼黻致唐虞三代之治

也烏乎盛哉於是知鳳陽府事潘公奉行惟謹而賴上
縣大夫以博士徐先生景顏薦既至而中書且有後命
許留見職景顏辭諸潘公請復歸掌教事公曰先生是
也國家以用人為急先生去而登諸班行不過先生一
人而已先生在而學者有所成異日晉之省臺布諸郡
縣用以為奔走禦侮疏附先後先生之功顧不大矣乎
時同僚皆躋公言景顏即再拜為別予以同年之契送
諸淮河上執爵言曰景顏可謂識進退之宜矣夫君子

安於所遇固未嘗求進而亦未嘗求退也不求進以見其不急於用世不求退以見其不果於忘世易曰時止則止時行則行而孔子於仕止久速亦當其可而已景顏家居太末為徐偃王之後世胄神明從容儒素浮沈里閭將四十年適聖運肇興有司敦進就試泐闈以書經中選來為潁上學官執經在座下者凡二十人皆通性理能文辭於其行也咨嗟涕洟戀戀焉意其復歸今茲果然矣是豈不足以慰其心耶往復去留何芥蒂之有

哉且夫富貴利達天也學以致用在人焉君子不謂天也獨奈何今之儒者自一經決科之外於禮樂典故文獻譜牒一切漫不省如或知爾則何以哉予之病此久矣景顏疏通明敏竭歸潁上講授之暇博記廣覽以資其見聞聖明在上述作之事日以大備駟車之名豈能舍我景顏哉

送泗州稅課局副使金仲止考滿序

國家立稅課以征天下之貨郡有司州縣有局軍國之

需率賴於是然多以儒者司之蓋經義治事初非二理明體適用有在於此豈曰理財非君子所宜哉金華金仲止年二十餘好學能文有司嘗以六科薦之天官試藝中選署泗州稅課局副使有難之者曰稅課冗職也子其若之何仲止曰先儒謂錢穀為己之學職分所在盡其力焉爾泗為兩淮要衝舟車憧憧無有寧日仲止既上任百貨之來相其貴賤多寡而輕重之持之以公平煦之以恩惠民皆懽趨恐後或仲止以他事出則

相顧延佇必待其親蒞得一言而後定既二年貢賦告
登而代者至矣仲止其賢乎哉仲止世居金華金華多
山水人才輩出儒先君子若魯齋王公仁山金公白雲
許公皆以道學沂朱子之傳若待制柳公侍講黃公今
學士宋公長史朱公亦以文章大家冠冕後進仲止生
於其鄉得其緒言餘論故其入仕之初不以為卑且冗
而善於其職如此夫洪範八政食貨為先禹貢一書底
謹財賦周太宰定九賦之法征斂隨宜迺今聖明在上

重本抑末征商之額取之有度仲止盡心周旋不虧官
不抑民異日為令為守為臺為省設施舉措從可知矣
易曰自天祐之吉無不利仲止其有焉予與仲止忝同
漕產久客臨淮聞名日甚茲幸得相見將與論世家文
獻之懿而以考績入覲京師其能介然於懷耶泗州博
士陳先生楚賓既合士大夫同致斯文之誼遂敘其出
處大畧於羣言之首

送鳳陽府稅課分司副使高彥芳任滿序

鳳陽興龍之地今天子肇建中都四方百貨之聚陸輦中土水道長淮視他郡為最有司相視地形於淮河之北岸置稅課局凡商賈取道虹縣及宿州司其征閩人高彥方氏來為大使朝廷用言者改為稅課分司而彥方昇為副使彥方年壯力强疏通明敏而長於幹濟自始至終逾四年而朝夕不懈如一日於是貢賦以登者當書績知虹縣事陳侯敬銘儒者也慎於許可獨於彥方每獎譽之且使來請序其概夫征税之法尚矣周禮宅

不毛者有里布民無常業者征夫家國家疆里之大生齒之繁凡山川土地所出所以衣被而飲食之者不能以數計關市之職量其多寡大小以三十而取其一隱匿者有沒入賞告之律其為法可謂詳且密矣然而貪黷之民欺公售私常額不登程督責備惴惴焉旦暮之不保者相踵也而彥方獨優為之不謂之才可乎彥方生於閩之南平蓋延平李先生之里也先生之學傳之考亭朱子考亭嘗論錢穀為已之學其於征斂之法固

嘗講之熟矣夫明體適用不當見之空言君子之於世
盖有無施而不可者易曰理財禁民為非曰義彥方其得
於儒先之緒餘者耶予典教臨淮若彥方之職業固當
目熟而耳聞而況陳侯之言有可徵者乎故不辭而序
之彥方世官閥在前朝嘗以門功司徵巡云

送清河縣稅課局副使劉與德考滿序

我鄉四明為文獻邦百餘年來流風遺俗猶有存者遂
初叔載王先生老成聞望師表於鄉時天台胡先生世

佐伯衡兩領鄉薦由儒學官歸老寓居於明胡先生三省之孫家有史學王先生厚齋尚書公之孫以玉海書著聞于世者也二先生先朝故家之契先後訓導明庠而沛縣劉與德以宦游執經居弟子列二先生愛之凡天人禮樂之奧典故文物之著詞章性理之微心傳面命學遂以進既歸卒業又十餘年而聖運肇興以秀才徵至京師試文吏部授淮安府清河縣稅課局副使清河當汴徐之衝商貨之交舟載車挽與德量其貴賤多

寡而為之征錢楮之入以貫以文計者載之赤歷歲增
月羨貢之府藏之庫而軍國之費賴是以出焉既踰年
考滿當代與德曰我庶幾無責可以退矣清河人士挽
留之莫能得乃使來請序以送之夫衣被服食民之所
賴以生者不先有以貢於公其何以致夫尊君親上之
心哉然而奸民黠胥窺避隱匿弊倖百端於是關市之
征不得不嚴矣國家之法錢穀為重監守自盜之律讀
者凜然而好事者往往羅織鍛鍊必致刑辟是以清

修謹飭之士不樂為之蓋其心戚戚焉不能以頃刻去懷也噫是豈立法者本意哉與德天資明敏而敦朴有守其於理財之要可謂不媿所學而無忝師門矣予家世四明於二先生既親且契胡先生即世已久不盡得其緒言餘論而以貢士忝教臨淮復聞王先生之訃老成凋謝為之盡然猶幸遇與德論師友淵懿期底於遠且大也夫為政之道盡其職分之所宜而已寬則民慢而事不集猛則民畏而心不安於二者而取中斯其庶幾

乎與德學而仕者也異日為良有司不當如是耶知清
河縣事陳立本予同經友也其當以是告之

送邳州稅課局大使韓民瞻序

越為浙左名郡屬邑蕭山當浙江東西要衝山川之秀鍾
之於人名家大族若湘湖韓氏民瞻世所謂才者也其先
魏國公以雄文直道致位宰輔自後登金門上玉堂者代
有其人際今聖運肇興徵用天下文行之士越有司以民
瞻應詔民瞻不得辭遂試藝天官中選授臨川縣主簿臨

川在大江以西其民好訟民瞻扶植善良勸治強梗罔不化服嘗奉省檄簿錄民財一無所私怨家固生事端訴諸憲府憲府悉辨其誣然猶左遷為邳州稅課局大使人有以為難者民瞻曰錢穀有司一事爾以治縣之道治務何難之有且我夫子上聖之資辭尊居卑亦曰會計當而已矣某聖門之徒也無入而不自得其可哉既至而邳在中都輦轂下大河南北形勝要地行商去賈舟車衝擾無有寧日民瞻量其貨之所直而為之征

多不為重少不為輕泉幣之入以文以貫計者登諸赤
厯儲之府庫月有餘而歲有羨矣人皆曰民瞻其果材
矣乎考滿邳之士大夫作詩以贈使來請予為序自古
英傑之士必厯試諸難況乎錢穀軍國所需儒者視為
切己之學者哉王文正公旦監潭州銀場余襄公靖監
筠州酒稅之二公者皆位登政府勲著疇庸其始也豈
以位卑祿薄恥為之哉民瞻世家賢子孫清修謹約凡
其設施措置之方皆得諸學問之素自茲以往功名富

貴何古人之不可及哉予家世四明與蕭山接壤夙聞韓氏之多賢有名某字奠之者慷慨論事縉紳竦敬於民瞻為尊行蓋嘗識其為人而予鄉先生黃公潤之以東發之孫輿學能文在元至正間講授其地民瞻蓋得其緒餘焉者傳曰魯無君子斯焉取斯其民瞻之謂乎於其入覲京師遂敘於羣言之首時洪武十一年歲在戊午正月既望序

送鳳陽府量積倉大使陳德謙考滿朝覲序

高郵陳氏為文獻大家在宋孝宗朝有名造者博學高行以
淳熙乙未進士積官朝散大夫入鄉先生四賢祠與孫莘老
喬竦並列俎豆尸祝不廢自是珪玨蟬聯領鄉薦及為運使
直內閣者相望後先入元為丹陽縣主簿名宏者亦以政事
有聲其在至正末為淮南參政名謙字子敬者則其孫也世
閥源流其有自來哉鳳陽府量積倉監納陳德謙父蓋處士
再福之子參政公從子也去朝散公六世矣龐厚老成而熟
於世故際今聖運以嘗逮事先朝徵入天官授安慶河泊所

官沔陽倉副再轉調今鳳陽維倉庾之司職冗秩卑凡而
關鑰之嚴契勘之要槩量儲峙之煩會計出納之重夙夜
盡心不遑啟處者有年矣人有戚之者則曰錢穀國家所
賴眇焉小子嘗恐隕越失墜以為祖宗羞顧其職所當自
盡者可憚其勞耶既考滿得代倉廩皆有餘羨會給散告
盡乃奉府檄入覲京師來別曰我耄矣將上休致之請倘
廟堂憐其愚衷歸掃丘龍寺田里以盡我齒榮莫大焉予
喜而復之曰是可謂能諗夫出處之正矣四時之序成功

者去人生幾何哉在少壯時志強氣銳視功名猶拾芥
齒髮既變奉身以退保沖養和以還造化舊物斯亦可
矣寧能與衆齊驅並駕耶德謙世業詩書善承善繼從
容仕版逾六十年而廉謹自律由始至終不以一毫自
累晚節令名庶幾保全矣聖明在上優老之令改官增
秩祿養終身所以蔭休于後嗣先耀夫前人者未可量
也傳曰積善之家必有余慶其德謙之謂乎予忝教臨
淮與德謙時相過從樂聞其家世之詳樂稱道之於其

將別殆不能忘情也異日幸得南歸道過高郵訪德謙於山水間觴酒稱壽取其平生律身行已錄而傳之使知朝散公之後尚有人焉

送新蔡縣知縣應先生致仕還里序

仙居應先生宗毅號木齋與學高行為有司所知洪武六年之夏薦入天官試藝高等授知汝寧府新蔡縣事賜紗帽襲衣銀束帶拜恩奉天殿下上任政舉職修未幾流逋四歸田野日闢戶賦歲增新蔡之民咸知有生

之樂由是興學校敦教化葺治郵傳興修水利凡事之
宜於官而便於民者行之畧脩部使者考覈以稱職聞
自郡府及衛閫至承宣布政司皆為崇重敬禮以為儒
者之效可暴白於天下矣一日先生慨然曰我老矣久
此何為者哉解印而歸獨不能効陶淵明也耶遂以老
病休致為請汝寧太守萬公孟雅為達諸朝報章既下
扁舟竟去新蔡士大夫父老及其民庶攀戀不忍別有
涕泣者先生曰我何政理而得衆心如此耶揮手謝之

過臨淮真以斯文之契賀之曰先生可謂得所宜歸矣
夫進退隱顯一於道而已進而顯所以行此道非所謂
趨競也退而隱所以存此道亦非矯激也古之君子平
日暇居以天下事置之念慮一旦列仕于朝仁義道德
之施所以堯舜其君民者特舉此加彼爾若乃功成名
遂投閒置散木石之與居鹿豕之與游逍遙徜徉以終
其天年其亦可以無憾矣使夫溺權要貪勢利戀戀不
舍一旦陷身不測噬臍可及乎且夫淞河以東素號人

物淵藪自十餘年來登仕版者不啻千百也其有奉身而退如先生者幾何人哉然則先生之歸天其有以默相之耶昔者聖人傳易於文言曰知進退存亡而不失其正者其惟聖人乎先生知進知退庶幾聖人之道哉真家居四明與仙居為隣壤服先生令名久矣茲客臨淮先生之出處大致實見而知之顧以教職羈縻耄年未及不得相從言邁心歉焉其弗寧也異日或得一遂幅巾杖屨訪先生仙居山下某水某丘指其釣遊之地

歌歸來辭觴咏為樂有若晉人之風流焉其亦可哉

送致仕鳳陽府儒學教授劉伯機父還金華序

七十致仕載於禮經詳矣數千百載以來著為令典莫之改也然人年至七十蓋亦罕矣既艾既耄而使朝夕困頓於簿書刑政之末不亦可矜耶夫仰惟聖明在上優老養賢惟恐弗及邇者玉音渙發命中外大小有司至六十以上許引年休致大矣哉堯舜之心乎予友劉伯機父金華蘭溪文獻望族博學多聞洪武六年以秀

才徵入京師授湖廣荊州府潛江縣稅課局大使考滿
調鳳陽府泗州通運所副使踰年以裁革調本府稅課
司副使分司新城三年貢賦登足奉考書入覲天官宗
伯以其年過六十上奏廷陞陞鳳陽府儒學教授致仕
時同列者六人上親御宸翰製誥以賜有曰劉伯機今
當調官而乃蒼顏皓首縱有自強之心終是年高故加
升等以養老於家大哉王言也典謨訓誥何以加哉伯
機持歸告諸祖禰誇耀鄉黨父老親友下及山樵野牧

歲諸篋笥將見虹光上燭矣烏乎伯機何以得此哉豈其明哲自保慎終如始致夫名遂身退之榮耶將祖宗積累之厚餘慶所及有以祚夫胤嗣之傳耶不然錦文犀軸鸞翔鳳翥豈輕也哉夫司征冗官也典教清職也稅課國用所關為之者或至於戾學校師道之重望之者或弗能得士大夫於斯二者殆不能兼善而兩盡矣伯機商稅之司克稱其職而於郡博士之任終顯榮厥身其非出處維時進退以道者哉瞻望故山修程言邁

田園清興從容晚節幅巾深衣以道德文章模範後進
古之所謂鄉先生者非伯機其誰歟

柴陽外史集卷二十四

欽定四庫全書

滎陽外史集卷二十五

明 鄭真 撰

序

嘉興宣公書院山長華亭陳君事績詩序

予讀唐辛讜傳未嘗不三嘆也方唐室中微龐勛以偏
伍庸材據徐宿攻泗水列城方鎮環觀坐視未有能任
夫分災恤患之責者辛讜一士人爾無官守言責以為

身累乃能請命赴難以泗州成功書之史冊有昭昭而不可泯者雷雲邁屯寓縣興難千載之下豈無忠義自任奮身不顧如謹者其人乎至正十六年夏四月高郵張冠陷松江凡郡人以才望稱者皆受偽爵宣公書院山長華亭陳君慨然曰我志欲吞此賊爾烏能忍恥偷活於此耶出私帑募勇壯三千人即所居為營以拒之時江淞行省參知政事楊中奉公駐師嘉興君遣人間行請益兵止得文千戶所領十有八人君以大義撻衆

帥假以兵威則功業之成視辛讜豈少哉予藝居東海
無由與君論議以發所蘊嘗誦鄉貢試中之文想君之
為人武林楊子玉以事來遂作詩以美之君名善字充之
詩云吳松之壤東南奧區歲在丙申羣寇突如朱巾赭
裳陸梁恣睢乃賊乃戕乃毒乃荼桓桓陳君誓不辱污
指廩發囊伏羲奮呼從者如雲仡仡萬夫修我戈矛為
君前驅請命轅門是究是圖秣馬廐兵剪馘執俘寇狂
假息有若釜魚彼何人斯委心奸渠俾我子立力寡勢

孤慘焉骨肉橫罹非辜籍我土田火我室廬轉徙流移
莫適有居忠憤之蓄鬱焉弗舒赫赫明廷唐虞訐謨省
署憲章登于宸都胡不名爵金紫曳婁太史秉筆古之
董狐傳之後來請從簡書

予向居東海上為山長公著此文公見而喜曰此士
大夫公論也際今聖朝而公之姪孟敷為中都宿州
學正適予亦教諭臨淮嘗出以相示及九年任滿同
升教授又同在江西屬郡既三年孟敷以書求此文

出舊稿錄以歸之併記于後

應節婦張氏旌表門詩序

國家著禮典為目三十有二而旌表與焉蓋所以崇教化美風俗為天下後世勸也四明節婦張夫人有賢行年二十二歸應氏生二子七年而夫君卒夫人慟哭言曰夫者婦之天既絕我天矣何以生為繼而又曰夫之不幸天也我其忍死以終厥志乎躬服襄事除喪不事容飾日承事舅姑惟謹及舅卒盡鬻奩具以殯以葬一

如禮制又推其餘以嫁其夫之妹四人二子則俾之從
師問學既長克以才行見知名公鉅卿遂有祿養今其
姑年踰九袞而夫人亦已老矣會廷臣經畧江南遂得
旌表其門太史周公傳其事縉紳士大夫又為歌咏之
烏乎是豈不可為世道勸哉嘗試論之女子之嫁也三
月而廟見既成婦矣蓋將終事君子以遂家室之宜也
中道而乖乃其不幸之大者於此而不失其正焉固常
情所難而亦女婦之當自盡者非徒欲為門戶榮也乃

今富家巨室多藉是為倖免徭役之計夫豈制禮典者
本意哉以夫人觀之節義以守其身文行以勗其子孝
足以奉尊惠足以及衆至行彰彰不可誣也故其無資
產勢力之助卒能高大其門蓋天理所常行而公論所
不泯者書所謂表厥宅里樹之風聲者於夫人誠有合
矣系之以詩曰懿惟夫人有肅令容內教式承沖和敬
恭相攸立配於彼儒族命也不辰罹爾慙獨中閨窈深
明月夜光晤言孰親顧影皇皇永矢厥心如金如石地

下天高百歲一日白髮在堂克謹膳羞而舅庵喪孰相
其憂我飾我粧迺貿迺易以孝錫類惟禮是式翩翩二
雛矯焉高飛娛養樂康爛斑舞衣皇矣熙朝崇尚節義
於赫旌書榮需寵賁詔爾子孫永涵天休矢詩以歌配
于柏舟

送王繼遠歸天台詩序

天台王繼遠個儻好義士也其先七世祖獻肅陳公在
南渡時歷事兩朝為名法從繼遠以父命出後王氏在

至正間以逮事先朝得謫居臨淮縉紳君子樂稱道之
予以鄉貢來主教事與繼遠斯文之好為至間與登鍾
離故城仰獨山之高勝俯長淮之險要帝鄉神都之盛
觀近在咫尺凡古昔疆理形勢因得指而論之繼遠曰
昔吾獻肅公之事先宋也嘗以天下安危為已任直前
論事慷慨激切大槩以臨安僻在東南藩籬喉咽當以
淮襄為重淮控引山東襄經制中原守襄當得唐鄧守
淮當得海泗金人泛使議和每以四州為言而公建議

以四州之地決不可棄阜陵知勇天錫銳意恢復而扼
於羣臣卒不得逞於是唐鄧海泗之得失與南渡相始
終矣吾幸生治朝遠游千里經覽陳迹質以先獻肅之
言感慨係之矣予既諦而聽之暇日從繼遠得獻肅公
家集具載輪對上殿劄子及奏疏貼黃皆論南北利害
大計喟然嘆曰至哉言乎其國家盛衰消長所關乎乾
道君臣克取而行之必能厲戈北向雪復讎恥何至界
淮中流為小朝廷應應於八陵坯土之悲也耶世異事

殊九原莫作故家文獻之傳乃於繼遠而取徵焉獻肅
庶幾為不沒矣今天下一家輿圖之盛亘古莫及繼遠
以家學之正異日進用於廷其不曰公侯復始乎予於
繼遠竊有慕焉因其歸天台作詩以贈且序其出處論
議之懿冠諸篇端云驅車濠梁道薄言向南州江河隔
千里中情邈悠悠矯首赤城霞五采聯瀛洲故山幸無
恙歸來成宴休旭日耀桑梓浮雲洩松楸清晨聽喚起
芳晝聞輶輶蘊真愜所遇泉石聊夷猶親賓列冠蓋佩

琚鏘琳瑯樽壺湛清醕鼎俎羅瓊羞十年慰契闊咏歌
相獻酬物情競朝夕變幻如蜉蝣保身樹明哲前修以
為傳

送鳳陽府學教導陳繼先歸清漳詩序

清漳陳繼先由國學生來為中都鳳陽府學訓導弟子
員母蘇氏在堂年七十餘繼先在鳳陽去家五千餘里
以音問之不通祿養之莫致也悵然南望泣然以悲其
鄉人過者或言於繼先曰汝母病亟勢將屬續繼先驚

恒仆地國家之法凡仕宦於外其父母在家或病或死
非其所司有文移印信為憑據者不得解職以去繼先
徬徨無所出因請於郡府檄漳之龍溪縣問其母安不
以為去留而龍溪之有司不知為政之大體不諒人子
之至情郵傳上遞謾不啟視催檄至再而終不以報也
道里遼遠山川阻深南州往來之使不得一介焉繼先
亦無如之何矣會鄉友賴君恩順與繼先同業成均又
同訓導鳳陽今年夏六月由省親復職以其兄計來則

其母已小祥矣繼先徒跣號慟水漿不入口累日有弔之者泣而言曰天下之人寧有母死逾年始得聞之如予不肖者乎且我不得終養而使我母一至於此我罪大矣何以生為鳳陽太守李公聞而悲之為之達禮部俾駟遞以去予以斯文之好送至南門外告之曰繼先其可謂孝矣夫父母之喪見星而行見星而舍繼先豈遼緩於此哉訃告之不時動靜之或制繼先豈得而自由耶天地之間凡有血氣者莫不知愛其親況人為萬

物之靈於其至親存亡之際也耶惻隱之心人皆有之
秉彝好德非外鑠我也有忍死其親忽焉而不加恤如
龍溪有司者獨何心也哉昔後魏淮南王長史趙琰以
二親之喪不得越關歸葬至絕鹽粟斷諸滋味二十餘
年惟食麥而已而南宋海虞令何子平父喪八年不得
營葬晝夜號哭常如袒括是其天性至孝有非常情所
及者繼先以儒得祿將以為養也而越在畿甸親之疾
不及奉藥以嘗歿不及憑棺以斂閱歲歷時訃告始至

是其風木之悲蓼莪之感有不容已者然而喪事即遠
有進無退窀穸之事所以安安其親者盡禮無違庶幾
始終弗憾矣然則繼先其亟歸矣哉清漳文物之邦昔
者考亭朱子過化之地也考亭著為家禮喪葬之事損
益適中漳之士大夫講之熟矣諸侯家魯於是觀禮盖
庶幾焉繼先歸而取行之使觀者有所感發其不曰禮
義由賢者出乎因作詩以舒其悲且為序其篇端詩云
窈藹北堂居猗猗媚叢萱永言忘憂物金蕤耀以蕃一

朝霜風發慘慘摧芳根白日無精景重雲翳朝昏遊子
遠行役遲遲歸故園中心悵莫及泣血漬深怨憶昨別
離時慈闈爰且言為將手中線致此鞠育恩壽命有盛
衰容顏失清溫慈養不得終空復盤中飧昊天邈萬里
何能訴重閭誰如古巫陽用以招冥魂

雲巖小隱詩序

潁上縣主簿廬陵顏先生朝宗唐太子太師魯公之系
魯公嘗為吉州別駕遺愛在民歲時俎豆尸祝之今郡

麗譙西祠堂存焉郡之屬邑曰永新西南百餘里曰禾
山兩崖壁立長溪綿絡入於禾川與吉江合流魯公在
郡時嘗至其地大書巖石上曰龍門溪愛其幽阻僻深
留其季子碩居焉故宅有魯公擣衣石嘗著靈異人莫
敢遷之因號為平原石豈其遺德所存者耶子孫蕃衍
分為數族散處各邑歷唐及宋以至今日登名科掌教
席及仕州縣者相望先生以世澤獨家石巖巖上常有
雲氣或時神物蜿蜒雷轟電掣霖雨大至懸崖飛瀑萬

鼓齊鳴蕩擊噴薄奔放而下不知其幾百里也先生樂得其勝因號為雲巖小隱云會朝廷蒐羅巖穴先生以有司敦迫與羣士旅進天官授蜀西順慶府蓬州營山縣主簿歷六載以革併調官潁上縣簿書期會朝夕從事而耳存目注未嘗不在雲巖也於是用古篆法扁其所寓而會稽陳能舊嘗繪以為圖縉紳士大夫咸為詩詠歌之先生以斯文之雅請予序其意夫山川以人而勝南陽以諸葛也東山以謝安也彭澤以陶潛也蘭亭

以王羲之而始著浣花溪以杜少陵而益顯匡廬香山
以李謫仙白居易居之而後人為之嚮慕興起夫君子
所過者化所存者神即其地而想其人而其人為不可
忘矣況夫堂構菑播之重嗣世象賢追念本始有以永
其德澤之傳者哉江右山水廬陵為盛蓋天地扶輿之
氣鍾聚凝結有如此者而龍門溪特以魯公大書深刻
遂名天下子孫居之詩書禮樂之風數百年如一日人
固以為文獻足徵矣魯公為唐忠臣世之儒者言其不

死計其忠烈之氣殆與天地並存矣乘雲而來乘雲而往疑若在是巖之左右前後也神而明之存乎其人脗祚骨肉之親精神血氣之感俯仰上下慨想其冠帶立朝專城出使之日儼乎如見其伉祿山而罵希烈忤輔國而誚盧杞也功名勲業嗣而續之與魯公同不朽可矣豈徒視白衣蒼狗之變化以自適其意者哉夫雲行雨施品物流形大易所以明乾道也先生精於易學通乎天人向者隱于雲巖固嘗以天下事置之念慮矣今

出倅畿甸寧不以所學施之有政乎異日升之廊廟遇
大旱作霖雨使天下之人視雲巖猶傳巖焉斯其無媿
於魯公之後人乎傳曰無念爾祖聿修厥德為之序而
系以詩曰

截彼雲巖維其高矣孰世其居儒衣褒矣自古在昔匪
一朝夕載經載營言作爾室山高水深德人德音寤寐
孔懷湛焉厥心浮塵斯迥俗氛斯屏攸芋攸躋閭焉幽
隱雲兮卷舒我起我居從容以時或詩或書雲兮變幻我

顧我盼用之則行時豈云晏曰惟我祖太師魯公正色
立朝教言則忠來遊來邀以命其嗣厥構貽謀克趾其
美山川神靈有聞無聲乘彼浮雲太空冥冥天高垂象
以寓遐想厥降在茲非惚非恍大明中天禮羅徵賢其
來于于賁然翩然旅進于廷需恩錫寵民社之司靡勞
靡冗列列潁陽煌煌帝鄉故山邈悠歸焉相望雲兮在
天咫尺非遠樂以忘憂動靜隱顯相時綢繆膏澤我民
為雨為霖與物其春慶門珪珎盍繩其武雲漢昭回以

奉明主

東海池公溥孝行詩并序

嘗閱太平御覽載古孝行事甚備彭城劉師貞以夢母而識其母之容狀東平孟元方以夢而知盜發其母之冢滎陽鄭邯以夢教令啖杏而愈其母之疾病及讀柳宗元銘墓之文天水趙來章以神人示兆而得見父柳州府君之墓今觀劉先生貢寓董先生士勉著東海池公溥孝行事亦以神童示夢而尋遇其父正與古類世

言至孝通天地感鬼神其信矣哉按周禮紀夢有九思其一也公溥之夢其思歟思存其心在平常旦夕之間公溥奉二親避兵倉皇中父子相失至誠懇迫天地上下實臨之神童之示夢豈特以其尋常旦夕之思耶然以夢得其父幸也以重傷奄至大故抑何不幸之甚耶夫父子之道天性也人心義理本諸賦予之正凡人莫不有之歷千萬世不變也私欲汨之於是有忍死其親者矣公溥當喪亂患難之時父斃於兵藁殯從事不共

戴天之義弗容於苟存矣而寇盜蔓延遍于齊梁操戈
剗刃莫辨誰何縗墨哭泣視諸天而已孤惻喘息眇
焉如縷而展轉千里十有餘年戀戀哀慕有如初喪躬
際承平復覩天日之盛卒能歸葬其父終養其母生者
死者各盡其禮是固常情所甚難者而公溥能之傳所
謂欲報之德昊天罔極者其斯之謂歟予雖不識公溥
而以劉董二老先生皆良史才紀事之實為可證據輒
因其言作詩以美之其詞曰

驅車上中土川塗邈以巖雙親正華髮客行奈時危弄
兵彼何人殺氣腥風馳倉皇負所天骨肉成乖睽追奔
幸一憇感此吉夢隨崎嶇澗谷深忍能見瘡痍奄忽成
永訣荼毒猶割剗叢殞泉隧間禮制諒勿違號慟蒼松
根愁雲天為低淚盡眼欲枯骨立膚其羸所幸不即死
寧復嗜甘肥竭歸向閭里庶以奉母慈大明赫中天恩
光浹四陲薦書上京國懇懇拜且辭富貴非所欲但祈
終我私言瞻舊時路行行記梁齊返葬捧遺殖北風襲

麻衣我馬鬣封水砂獻神奇蓼我感劬勞風木增悲
悽至行昭格享永言福履綏大書示千古金石粲光輝

太常司丞方公資深使還詩序

洪武十三年秋七月望日聖天子孝享皇陵先期命禮
官奉幣行禮而太常司丞天台方公湜資深實當使遣
公既俯伏拜命出次龍江乘驛舟泝大江涉長淮風水
急駛擢夫奉功一瞬百里以某日至中都將事之夕齋
戒沐浴具衣冠省牲視饌品物備具昧旦作樂成三獻

禮燔瘞如式竣事享昨天光發舒嘉祥駢集公出郊將復命京師過臨淮及鳳陽府推官宋君廷臣抵謁先聖博士諸生相見以禮公論及祀事以為宗廟祠祔烝嘗備見周制若山陵之禮則周官所謂冢人凡祭則為尸者其畧也自秦始皇出起寢於墓側漢室因之故陵有寢殿起居衣冠象生之備降及東漢因而不改每四時朔望二十四氣伏臘及社定為上飯之儀以禮官行事宮人隨鼓漏理被枕具盥水陳嚴具天子以正月五日

上陵則郡國計吏亦得從之占其郡國災祥豐歉欲使
先帝神靈具知之蓋事亡如事存不得不嚴者今天子
孝思維則霜露慨然羹牆之見若舜之於堯也某自揆
不才忝在職掌奉命而來恐隕越為斯文羞今將還奏
九重諸君何以教我於是宋君及鳳陽教授吳先生義
孚進而言曰公之於禮如是博且詳也不謂之能其官
可乎抑聞之禮貴於誠敬聲名文物特其末耳周公升
歌清廟苟在廟者愀然如見文王焉不誠且敬其能之

乎夫臣職之恭即君德之著也上之奉先下之奉上一誠敬之交孚是以駿奔對越洋洋在上來享來格熙事備成社稷臣民之慶萬年賴之盖有以交於神靈必有以同福祿然則宣室前席之召非公其誰耶公聞其言首肯者再送至淮河上再拜為別至八林阻風賦詩四十韻寄郡府及庠序諸君子凡使事之誠友道之懿山川之所歷習俗之所見莫不備著而詞意典雅有杜少陵韓吏部之風可謂能賦之才大夫矣昔在元蜀郡邵

庵虞公金華烏蜀山柳公常官奉常當重熙累洽之時
凡朝廷大亨大朝會見諸詩歌金聲而玉振之讀者羨
艷興起公其何慊於斯哉子家四明與天台壤地相接
尚論先契愛厚為至謹次韻成篇致戀慕之意且序其
事於首云

天朝崇孝治蒸嘗藏先祠皇陵松柏深扈衛貔虎師禮
樂盛典制壇壝嚴威儀金匱抽祕藏類以編簡推黃流
湛芳馨圭瓚榮陸離熙成備格享清廟賡周詩侃侃太

常公衣冠偉文儒

叶而

騫若綵鳳翔陋彼班豹窺對揚列

廷陞凜然冰雪持內籙肅將幣奉命寧紱維涉江浙長
淮滄波天渺瀰靈神迓天使舡頭舞蛟螭厯險吁已艱
秉心矢弗移齋宮爰戾止清風洒旌麾多士咸駿奔宰夫
效驅馳嘉牲告充腍薦俎寧遲遲昧旦竣禋事漸漸金
烏飛式瞻河漢間星斗繁有輝曙光燭馬廐曉程報雞
埭使華條云返早飯何容炊芹宮幸一憇禮賜承先施
知己逢叔弔哲人覩先箕少將雞黍獻何有熊羆斯

文已波靡砥柱非公誰相忘饌席間古道何怱至理
蹟幽眇名言闡淵微毫鋒縛霜兔洒洒雲煙揮磊落珠
琲粲爛煥雲錦如叶士林相唱和吹埙間鳴篴重壁見
垂棘名寶誇璫璫叶笑談一傾蓋樂此新相知都俞際

明聖有若唐虞時招徠慰宵旰佩綬鏘王畿行膺玉堂
召紫泥進摛辭老學飽研磨況乃年耆大 hands 燕許筆
永言千載期嗟予忝泐產同鄉願陪隨阮籍遇青眼馬
良逢白眉矯首翰墨林汗竹紛如圍秋高望鴻鴈寫寄

千里思

一灣煙水圖詩序

海寧賈君惟敬謫居潁上縣扁其室曰一灣煙水邑簿
廬陵顏朝宗繪為一圖題詩其上嗣而和之者有人矣
會惟敬南還舟次濠梁出以相示予笑而謂之曰此所
以示歸兆也天壤之間水居其多知者樂水以其周流
不滯有似於水也惟敬其知者歟且水之大者莫海若
也惟敬家黃岡在滄海上水之大者固常見之矣客處

淮潁其取義於一灣煙水者所以誌不忘焉爾宜君子
以為必歸也然則扁焉觀焉徇名而求實其何間於彼
此哉遂歌詩誌別云

野水晴川望海遙光開寶鑑散風濤鼓琴出聽魚龍近
彈鋏驚飛鶴鶴高隔岸不煩呼折簡倚空時復醉揮毫
黃岡路接蓬萊島仙子來迎炫錦袍

知五河縣事曾君

闕

號北溪詩序

長沙山水名郡屬邑三湘惟湘鄉為最湘鄉有連水南

流百有餘里是為春溪綿絡岡隴映帶林麓逶蛇曲折
莫測遠近溪之水清澄瑩徹洞見深底而崖骨石齒劍
攢珠纍舟楫不通每雨晴月霽俯而聽之潺潺汨汨若
琴瑟之鳴而璆琳之奏也邑士曾君闕隱居其上一

榻清晤塵坐不入客至燕笑從容賦詩行酒以為樂嘗
慨然曰我其終於此矣乎且號為北溪云會朝廷急於
用賢君以文學薦入京師授知五河縣事五河中都畿
縣之一簿書刑政日不暇給而北溪之勝蓋夢往而神

馳矣縉紳士大夫為之贊詠者盈卷軸予得而觀之嘆其幽情雅致有非淺俗所及者夫天地之氣凝而為山融而為川山川之秀非哲人君子不足以當之蟠溪以太公望也濂溪以周茂叔也其功名之盛道學之尊孰得而議之然而柳子厚辱溪以愚陸希聲號溪為蒙亦得與穹壤相不朽然則其地之靈其人之傑也耶長沙在三江五湖中有屈大夫賈太傅之遺風名世大儒若考亭朱夫子廣漢張南軒存神過化後學企仰君以文

獻故家與之相望千百載之上濯纓自潔初無意於人間世也然而隱顯隨時出處二致向在林泉今登朝寧斯時北溪之勝固已增輝改觀矣於是而澄其心易其氣處事接物有如水之清且明焉我見其淵乎其有容浩乎其不窮雖在數千百里之外豈不猶在此溪之上乎昔宣聖在川上曰逝者如斯夫不舍晝夜釋者以為與道為體君學聖門者也循名求實其在於此乎君為予一笑遂為之序而係以詩云

汚彼溪流蜿蜒山谷曰廓而容曰杳而曲輝光內涵精
英上浮皎焉明鏡鏘焉鳴球有斐君子于胥樂只以號
配名克濟先美宴居從容以遊以遨言涉其深言陟其
高有卉有葩有蘋有藻掇英擷芳幽探遠討天高日晶
湛然虛明涼風徐來掬其清冷鸛鶴飛翔龜魚遊躍上
下昭昭豈不識察人亦有言至清者泉心術如此可象
聖賢弗撓於中孰塵孰滓謂言不信有如此水

槐橋野趣軒詩序

括蒼葉君伯玉年及六十老成文獻之士際今聖運以
六科徵入天官授平涼府開城縣主簿在參佐之職嘗
扁其所居軒曰槐橋野趣而為之圖蓋紀其鄉里之勝
以示不忘其僚友孫先生大年紀之會伯玉以兩考朝
京師過中都請予申其說而予何足以知之按槐橋在
龍泉縣南十里臨高制下為縣之要會伯玉家於其地
已及數世其係以野趣云者蓋因其意向之適云爾今
即其圖觀之大山深林迴旋磅礴而平原廣阜犬牙參


錯非有朝市之盛闐闐之富公府之嚴也一篙中分兩
水交會煙草雲樹淒迷慘淡蔀屋荆扉星布遠近白髮
老叟曳杖而來者偃僂匍匐言俚語前呼後應非有
聲名文物之聚衣冠禮樂之集也然而伯玉得其趣而
樂焉則固不以彼而易此矣括為仙都上直少微星其
人物往往有隱君子之風伯玉家于槐橋將底終身殆
不啻李原之盤谷孫登之蘇門林逋之孤山矣然顯晦
非二道出處本一致向在于野今登于朝凡所設施舉措

之方皆平日涵養之素其意向之適固無入而不自得矣於是樵於山耕於畝獵於園與二三君子考盤丘壑間其心之所得意之所趨殆與天地萬物同其妙矣昔我四明鄉先生蒙齋袁公嘗曰我觀於草木之發生禽鳥之和鳴悠然與我心契其樂無涯然則槐橋野趣其有得於茲耶因為之序而繫以詩云

眇彼槐橋龍泉之陽神鍾秀聚山川相望懿美君子茲焉考室言即于野惟趣之適元氣太和塊軋氤氲兩間

化育萬彙以均因象賦形至理斯具意向之趨心領神
悟如飢得食如渴得漿朝夕坐忘樂哉相羊視世營營
各惟厥志朝者爭名市者射利理欲異情匪公伊私我
心休休先烈依歸質諸義經同人于野至趣之存有不
忘者聖治文明賢才彙興天光寵賁粲兮弓旌大道之
公豈不在我時仕時止我無不可歲月其徂盍不歸歟
收視反聽式完厥初桑梓敬恭東阡西陌爾汝兩忘誰
主誰客德人德音或嘯或吟從容者天淵乎爾心猿鶴招邀

某山某水優哉游哉永言樂只



榮陽外史集卷二十五